

**UPA 12 nallertinnagu Naalakkersuisoqarfiiit suleqatigiillutik inuussutissarsiornermut inatsit siunertaanngitsumik isertortumik akunnermuliuttoqarsinnaangortitsilluni (stråmandsvirksomhed) Kalaallit Nunaanniit aningaasanik annissuinissaq siunertaralugu nalorninarsinnaasumillu aningaasannanniarluni transfer pricing atorlugu periarfissiinersoq misissoqqullugu, tassunga ilanngullugu piginneqatigiissutnik tuniniaaneq atornagu aningaasaatillillu aningaasanik attartugaralugit aningaasaliineq atorneqarnersoq pillugu Naalakkersuisut inuussutissarsiummik ingerlataqarneq pillugu inatsisartut inatsisaanni allanngortitsinissaq siunertaralugu suliaqaqqulligit peqquneqarnissaannik Inatsisartut aalajangiiffigisassaattut siunnersuut**  
(Inatsisartunut ilaasortaq Kim Kielsen, Siumut)

### Akissuteqaat

(Inuussutissarsiuutinut Aatsitassanullu Naalakkersuisoq)

### Siullermeerinninneq

Inuussutissarsiornermut maanna inatsit ulloq 1. januar 2002-mi atuuttussanngorlugu 2001-imi akuerineqarpoq.

Tamatuma kingorna inuussutissarsiornermut inatsit ataasiarluni allanngortinneqarpoq, tassalu 2006-imi. Nunatsinni inuussutissarsiutit annertuumik ineriarput, soorunalumi tamanna inatsisikkut eqqumaffiginiarneqassaaq malinnaatinneqarlunilu. Naalakkersuisut isumaqarput inuussutissarsiutit assigiinngitsut sapinngisamik assigiinnik maleruagassiuunneqassasut.

Nunatta karsianut akileraarutnik akiliinnginnissaq siunertaralugu Kalaallit Nunaannit aningaasanik annissuisinnaanerup nalorninarsinnaasumillu transfer pricing (transfer pricing tassaavoq suliffeqarfissuit nunani assigiinngitsuni angerlarsimaffeqartut nunanut akileraarutkinneruffiusunut isertitaminnik nuussinissamik siunertaqarlutik akinik aaqqissussanilluunniit allanik aalajangersaasarnerat.) atorlugu aningaasannanniarinnaanerup akiorniarnissaannut inuussutissarsiornermut maanna inatsit naleqqutinngimmatt Naalakkersuisut siunnersuuteqartoq isumaqatigaat. Akileraannginnissaq siunertaralugu isertortumik akunnermiliuttungortitsisarneq akiorniaraanni akileraartarnermut inatsisip misissornissaa immaqalu inuussutissarsiutinut assigiinngitsunut immikkut inatsisit misissornissaat naleqqunnerussaaq.

Taamaalillunga taasinnaavara aatsitassarsiornermut inatsimmi § 16, tassani tranfer pricing atorlugu aningaasannanniarinnaanerit taamaattut pinaveersimatinniarlugit ersarissumik maleruagassaqarmat. Suliffissuaqarfinni pissutsinut atatillugu aatsitassarsiornermut inatsimmi aningaasangortitsisarnermi immikkut piumasaqaateqarpoq aammalu ingerlatseqatigiiffit suliffeqarfisiup iluani akit piumasaqaatillugu isumaqatigiinniutigineqartassasut. Inatsimmi tassani aalajangersagaqarpoq aningaasanik annissuisinnaanermik akiuiniarnermik imaqartumik taannalu Namminersorneq pillugu Isumalioqatigiissitap suliaanut attuumassuteqarpoq.

Pissutsip tamatuma inatsisini assigiinngitsuni maleruagassiorneqarnissa tulluartuunngitsoq Naalakkersuisut isumaqarput, soorluttaaq aningaasanik annissuisarnerit akileraartarnermut attuumassuteqartuusut akileraartarnermut inatsisip saniatigut inatsimmi allami maleruagassiuuneqarnissaat kaammattutiginanngitsoq.

Inuussutissarsiornermut inatsisip nutarterneqarnissa pisariaqartoq Naalakkersuisut isumaqatigaat. Inuussutissarsiornermut inatsit suliassaqarfitt ilaatigut ullutsinnut naleqqukkunnaarsimavoq nutarterneqarluarsinnaallunilu, taamaalilluni ullutsinnut naleqqunnerulersillugulu immikkut inatsisinut allanut naapertuuttungorsinnaaqquillugu.

Naalakkersuisut paasissutissiissutigisinnaavaat inuussutissarsiornermut inatsit nutarterlugu suliaq maannangaaq aallartinneqarmat. Nutarterinermi tassani inuussutissarsiornermut inatsit naapertuussorinngisat eqqarsaatigalugit sukumiisumik misissorneqassaaq, ilaatigullu isertortumik akunnermiliuttoqarluni ingerlatsinissamut inatsit siunertaanngitsumik periarfissiinersoq pillugu misissorneqarluni tamakku Kalaallit Nunaanni inuussutissarsiornermut inatsisissatut siunnersuummi nutaami pinngitsoortinniarneqassallutik. Nutarterinermi tassani Aatsitassarsiornermut Naalakkersuisoqarfik suleqatigalugu Inuussutissarsiornermut Suliffeqarnermullu Naalakkersuisoqarfimmit ingerlanneqartumi susassaqartut tamarmik suliamti peqataatinneqassapput.

Inuaqatigiinni ineriaartorneq ilutigalugu suleriaatsit nutaat pileriartorput atuisunit suliffeqarfinnillu atorneqalersut. Tamanna inatsisikkut aamma takuneqarsinnaallunilu eqqumaffiginiarneqartariaqarpoq. Aallarnisaasut inerisaasullu Naalakkersuisut tapersorsorumavaat. Taamaattumik inuussutissarsiornermut inatsimmi maleruagassat eqaannerulersillugillu pisariillisarneqarnissaat siunertarineqarpoq.

Taamaattumillu Naalakkersuisut isumaqarput transfer pricing atorlugu aningaasannanniarnerit pilligit apeqquit akileraartarnermut attuumassutilit inuussutissarsiornermut inatsimmi maleruagassiuuneqarnissaat tulluartuunngitsoq. Taamaattorli inuussutissarsiornermut inatsisip nutarterneqarnissaanik pisariaqartitsineq siunnersuummi taaneqartoq Naalakkersuisunit isumaqatigineqarsinnaavoq.

Taamaattumik qulaani pineqartut tunngavigalugit Naalakkersuisut siunnersuutip itigartinneqarnissaa inassutigaat.